

# CORONICA 2020

## L'allianza e la lavinetta naira

MARTIN CANTIENI

Ils emprims da schaner 2021 vegn ad ir en vigur la fusiun da la Partida cristiandemocratica PCD cun la Partida burgais-democratica PBD. Quai han las duas partidas decidì quest atun. La nova partida naziunala ha lura num «Die Mitte»

E per rumantsch? «La mesadad» proponiss la mala creanza dal venter. Ma per ils translatur rumantschs mo vanza in tschien-ter ed els creeschan in, dus, distanza ed enter «l'allianza dal center»!

L'allianza duai dar nova forza ad omaduas partidas. La PBD era en privel da sparir, uschè drammatica è stada la sperdita da vuschs dals ultims onns. Ma in trist destin ha era la lavina naira, il bloc da vuschs sursilvanas per la PCD. Durant decennis ramplunava cun mintga elecziun la lavina naira tras la val. Davent da las chanzlas catolicas sisum la Cadi, cun schlantsch tras l'entira Surselva unshida cun la Gasetta Romontscha, procurava ella per resultats ch'i dat uschiglio mo en pajais pseudo-democratic. Anc l'onn 1967 han 96,6 pertschient dals umens sursilvans elegì candidats da la PCD per il Cussegl naziunal. Ma quests resultats sovietics èn daditg passé. L'onn 1995 han anc 75,7 pertschient elegì la PCD e dapi il 2011 è la partida crudada sut 50 pertschient (la mesadad). Cun la midada dal clima politic resta anc ina lavinetta che na stat enta pes a nagin.

Tgè è la «C(o)ronica da l'onn 2020»? – Jon Bischoff (illustraziun) e Martin Cantieni (text) commenteschan, resumeschan e parodeschan per la FMR 12 eveniments ch'ans han occupà durant l'onn 2020. Jon Bischoff da Vicosoprano illustrescha la fin da mintga mais per la FMR il «Mais da pais». Martin Cantieni da Turitg ha tranter auter gudagnà quest onn la concorrenza litterara rumantscha «Premi Term Bel». Damai oz l'emprima «coronica» or da lur penna.



ILLUSTRAZIUN JON BISCHOFF